

L.G. Smith Boulevard 12 awor ta completamente restaura

Lo bira oficina nobo di Notario Yarzagaray-Bodeker & Partners



E oficina di Notario Yarzagaray-Bodeker & Partners a caba di completa e renobacion y restauracion total di L.G. Smith 12, un edificio historico cu originalmente tabata e oficina principal politico di Juancho Yrausquin y mas despues, pa hopi aña, e cas di Miles Administration, cu su doño, difunto hotelero Ike Cohen.

Notario Yarzagaray, kende a cumpra e edificio for di Cohen, a encabesa e proyecto di renobacion y restauracion, studiando arquitectura Antiyano y coleccionando informacion pa loke t'e esfuersonan cu a wordo haci na Scharloo, Willemstad, Corsou. Despues di a completa e proyecto, e edificio awor ta sirbi Notario Yarzagaray-Bodeker & Partners, como un di dos ubicacion, banda di esun na L.G. Smith 20.

L.G. Smith 12 actualmente ta un joya di arquitectura Caribense, contando cu hopi elemento colonial tipico, incluyendo portanan Frances, bentananan cu jaloezie, vloernan di palo briyante, accesorionan "vintage" di luz, vitragenan di glas di color, y leishinan di plantacion riba e murayanan y plafond paden.

Riba e parti pafo, pinta cu un color alegre di geel, e edificio ta muestra su gevel Hulandes, un colonnade cu portieknan, cu filanan di mata y flor den pochi. Cada detaye, te hasta e heki ornamental y murayanan di hardin, ta fiel n'e estilo original di edificio colonial.

"Mi tabata sa cu nos no por a pasa riba e monumento aki cu un chubata," tabata e palabranan di e Notario, "e mester a wordo restaura bek pa su grandesa di antes, y duna un facelift total."

E edificio tambe ta bunita decoro. E murayanan blanco den e foyer cu tegel di marmer ta expone arte di e difunto Juancho Dijkhoff, di cual un di su piesanan a wordo completa despues di su fayecimento pa artista Elvis Tromp.

Varios obra di Eliza Lejuez tambe ta dorna e murayanan di e oficina, y tur tin como tema e renobacion di e propiedad.

Hopi aspecto original a wordo preserva, manera e trapi Hulandes tipico di palo cu ta subi p'e di dos piso, construi den cuminsamento di añanan 1940, e tegelnan colorido di mosaico uza p'e vloer, y e gangnan di gips, e estilo di e cushina bieu inspira pa Delft Blou a wordo reproduci, combina cu bañonan moderno. Nos ta desea e oficina exito den su ubicacion nobo, L.G. Smith 12 sigur ta algo pa ta sumamente orguyoso di dje.

